

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara:

Naalakkersuisunut apeqquut:

- 1. Qaleraleqarfiit mingutsinneqannginnissaat illersorneqarnissaallu qulakkeerniarlugu Naalakkersuisut qanoq iliuseqarpat ?**
- 2. Aalisakkat assigiinngitsut perlukuinik imaanut eqqaasarneq aalisarfinnut qanittumi pinaveersimatinniarlugu Naalakkersuisut qanoq iliuseqarpat imaluunniit qanoq iliuseqarniarpat ?**
- 3. Saarulliit pisarineqartut tamarmik inuiaqatigiinni tunineqarsinnaanerit iluaqutigineqarnerulersinnaanerallu anguniarlugu Naalakkersuisut qanoq iliuseqarpat ?**
- 4. Aalisarfinni qassutikunik, ningittangaarsiutinik allanillu ataavartumik salisarnissaq Naalakkersuisut kommunit peqatigalugit sulissutigisinnaavaa-at ?**

(Inatsisartunut ilaasortaq, Anthon Frederiksen, Partii Naleraq)

Tunngavilersuut:

Aalisartut ilisimatitsisarnerat naapertorlugu, pingaartumik qaleraleqarfinnut qanittumi saarulliit niaqukuinik erlaviinik allanillu aalisakkat perlukuinik aalisarfinnut qanittumi eqqaasarnerit aalisarfinnik mingutsitsisinnaaneq ernumassutigineqarpoq.

Taamaattumik paaserusunnarpoq, aalisarfinni mingutitsinaveersaarneq qulakkeerniarlugu Naalakkersuisut qanoq iliuseqarnerisut imaluunniit qanoq iliuseqarniarnerisut ?

Tassami tamatta soqutigilluinnarparput aalisarfiit mingutsaaliorneqarlutik illersorneqarnissaat aalisagaqartuarnissaa qulakkeersimaniarlugu. Isumaqarpungullu kommunit uani suleqatiginissaat pisariaqartoq.

Aamma suli maannamut sumiiffinni assigiinngitsuni tusarsaajuarpoq saarullippassuaqartoq, kisiannili tunitsiveqarnikkut ilaatigullu sulisussaaleqineq pissutigalugu saarullit tamakkiisumik inuiaqatigiinni atorluarneqaratillu iluaqutigineqanngitsut.

Taamaammat apeqqutit qulaani taaneqartut akineqarnissaat paaserusuppakka.

Ullut suliffiit qulit qaangiutinnginnerani akineqarnissara kissaatingaara.